

сяде с коня на конь, и начат битися сам крепце велми, многие полки Батыевы проежжая, яко всем тотаровем воздвигитися крепости и мужеству его и воинства его. Едва же многими полки тотарскими одолеша их. И ту убиен бысть князь Юрьи Игоревич Резанский, князь Глеб Коломенский, и князи местныя, и воеводы крепкие Резанския земли — вси побиены быша. Князя жь Олга Игоревича Краснаго яша жива, но велми ранена. Батый же, видя своих побиенных, и начат скорбити, и въ ярости своей начат воевати землю Резанскую, град же Пронеск разори до основания, и люди вся изсече без милости. Видев же Батый Олга Краснаго изнемогающа от великих ран и начат его прелщати во свою веру. Олг же Игоревич укори^а Батыя, нарече его безбожна. Батый же от мерскаго сердца своего опечалися и повеле Олга ножи раздробити. И тако сей скончася. Батый же поиде ко граду Резани, и обступи град, и боря его 5 дней неотступно, поне же бо войска Батыева множество и пременяхуся биующеся, гражане же всегда едини непременно. И мнози побиени быша, а инии уязвени, а инии от великих трудов изнемогоша. В 6 день погании приидоша рано ко граду, — ови со огни, а инии с пороки, а инии со множеством лестницъ, и взяша град декабря 21 день. И вшедше в соборную церковь и княгиню Агрепину Ростиславну мать великого князя, и иныя княгини и боярыни мечи изсекоша. Архиепископа же и чин священный огню предаша в соборной церкви, а во граде мужей, и жен, и детей мечи изсекоша, а иних в рецы потопиша. И ереи и черноризцев всех посекоша, и весь град пожгоша, и вся драгая и красная поимаша, киевское и черниговское поимаша, храмы божия разориша и во святых олтарех много крови пролияша. И не оста во граде том ни един живой человек, не восплака никто ни над ким — вси мертвы лежаху. Сия же вся приидоша на ны грех ради наших. И тако поиде на град Суздаль и Владимир пленити.

Некий же воевода резанский велможа имянем Еупатей Коловрат в то время был во граде Чернигове со князем Игорем Игоревичем, и слышав приход Батыев, и поиде ис Чернигова с малою дружиною. Егда же прииде в землю Резанскую и виде ю пугу, и град разорен, и церкви пожжени, и люди посечены. Еупатей восплакав горко, и собра войска 1700 человек, которых бог соблюде, бывших вне града, и погна во след Батыя, и доиде в земли Суздалстей. И внезапно нападе на станы Батыевы, и начат их сечи без милости. И смятошася полки тотарстии, и быша яко пьяни, изушевшеся, и мняху тотарове, яко мертвы восташа. Еупатей же полки тотарския проежжая, храбро и мужественно бияшеся, яко царю Батыю воздвигитися и возбоитися. И едва поимаша от полку Еупатиева 5 человек воинских, изнемогающих от великих ран, и привелоша их к Батыю. Царь же начат их вопрошати: „Коея есте вы земли, что вы мне много зла творите?“ Они же рекоша: „Веры есми христианския, рабы великаго князя Юрья Игоревича, а полку Еупатиева Коловрата. Посланы есмя тобя царя почтити и честно проводитьи и честь тебе

^а В рук.: укора.